

BIBLIOTECA LUMNEZIA

Biblioteca nova –
niev gust da leger

(cp) La Biblioteca Lumnezia fa midada e banduna la casa da scola a Vella. Suentar ina renovaziun cumpleta dils locals vegls dil Volg a Vella Palius secasa ussa da niev la Biblioteca Lumnezia en leu ed ei aviarta per tut las scolas e per la populaziun. Duront in'jamna dallas portas aviartas da gliendisdis, ils 16 da settember entochen sonda, ils 21 da settember ei la Biblioteca Lumnezia aviarta extraordinariamein mintgadi dallas 09.00–11.00 e dallas 14.00–17.00 (la sonda mo igl avonmiezdi). Aschia han in e scadina la pussevliadad d'emprender d'enconuscher las localitads e secapescha ils cudischs e tut las autras purschidas dalla biblioteca. Il team da biblioteca selegra d'astgar musar la biblioteca en niev vestgiu.

L'jamna d'avertura porscha divers puncts da program: Semplamein fuffgnar, sfegliar, prender ils cudischs ord cruna, leger in mumenet buend in caffè ni magliond in toc terschola? Quei san ins far il gliendisdis. Il mardis ei il suentermiezdi dedicau specialmein a seniors e seniors. *Simon Derungs* vegn ad esser presents per dar sclariment ed era per cussegljar in ni l'auter cudisch. Ils pli giuvens san selegrar sin la mesjamna suentermiezdi: *Angela Coltenberg* e sias marionnetas da teater raquentan praulas als affons ed insomma a quels e quellas che selaian fascinar dil mund da praulas. L'avertura officiala dalla biblioteca nova ha liug gievgia sera allas 19.00 cura che la biblioteca ei reservada per ils hospis envidai.

Venderdis sera, ils 20 da settember allas 19.00 ei ina prelecziun publica cun *Leontina Lergier-Caviezel*. L'autora oriunda da Vrin prelegia ord siu cudisch «Davos ils mugrins» ch'ei cumpariu igl onn vargau en la Chasa Editura Rumanstsch. Il roman raquenta dad in cass criminal captaus ils onns 60 en in vitg muntagnard – ina historia veglia che vegn denton puspei levantada dad ina dunna giuvna maridada el vitg. En la prelecziun cun in discuors moderaus da *Silvana Derungs* vegn Lergier-Caviezel a dar investa in siu roman ed en sia activitad da scriver.

Naven dils 23 da settember cuntinuescha la biblioteca cun siu menaschi normal; las uras d'avertura san ins consultar sin la pagina d'internet www.biblioteca-lumnezia.ch.

reclama



Südostschweiz informiert

Topaktuelle Nachrichten aus Ihrer Region von Montag bis Freitag ab 18 Uhr.

Nur auf TV Südostschweiz



AGID SVIZZER PER LA MUNTOGNA
 TEL. 01/712 60 60 FAX 01/712 60 50
www.berghilfe.ch info@berghilfe.ch

AIDE SUISSE AUX MONTAGNARDS



SCHWEIZER BERGHILFE

AIUTO SVIZZERO AI MONTANARI



L'exposiziun da Carla Gabri el Museum sursilvan ella Cuort Ligia Grischa ei da veser entochen la fin d'october da quest onn.



Sujets d'Uorsin malegiai sin material curdau dalla Casa Carigiet duront e suenter igl incendi.

In'optica particulara dil vitg da Trun

Interessanta exposiziun dall'artista Carla Gabri el Museum sursilvan ella Cuort Ligia Grischa

DA HANS HUONDER / ANR

■ **Trun ei buca mo il vitg dalla historia, digl art e dalla cultura, mobein era d'interessants baghetgs. Quei potenzial particular nezegia l'artista Carla Gabri per in'interessanta exposiziun. In film el format da 16 mm, fotos e picturas dattan perdetga dil vast spectrum artistic d'ina giuvna dunna plein fantasia e ch'ei buc ina nunenconuscha a Trun.** Il Museum sursilvan ella Cuort Ligia Grischa a Trun ei enconuscents per sias exposiziuns ambulant. Ellas van fetg bein a prau cullas atgnadads dalla vischnaunca ch'ei da muntada historica e ch'ha recaltgau in renem egl art e la cultura. Che quei ei aschia ei denter auter il meret d'entgens enconuscents artists, surtut Alois Carigiet, Matias Spescha ni era *Gieri Schmed* e sil camp dalla musica *Clau Scherrer*. Cun lur ovras han els fatg Trun enconuscents. Mo lu era la capientscha generala da vischinas e vischins per la cultura.

En retscha culs artists

En quella retscha d'enconuscents artists savess era *Carla Gabri* survegnir in plaz stabel. La giuvna dunna ei buca carschida si a Trun, mo passenta leu pliras jamnas da stad ed unviern dapi si'affonza. Entras sia mumma ch'ei ina Decurtins, mo ch'ei carschida si a Cuera, posseda la famiglia ina casa da vacanzas el vitg, buca lunsch naven dil museum. Da siu atelier anora vesa ella baghetgs historics, denter auter la Casa Carigiet ch'ei daven-tada l'unfrenda d'in incendi. Gabri ch'ei carschida si a Zezras ha nezegiau las jam-



Dapi si'affonza passenta l'artista Carla Gabri mintg'onn pliras jamnas a Trun.

nas da questa stad denter siu studi per sededicar artisticamein al vitg da Trun. Ils elements da quei art fetg different ein da veser el museum entochen la fin d'october 2019. L'exposiziun senumna «Welt-RÄUME IN TRUN».

In'otra optica dil vitg

Che Gabri ei in carstgaun attent ed era marviglius – quei ch'ei drova probabla-mein per saver luvrar creativ ed artistic – muossan las lavurs exponidas el museum. Cun ina veglia camera da filmar dalla marca Rolex eis ella spassegiada atras il vitg ils davos meins: «Jeu hael sapientivamein buca vuliu filmar glieud, mobein objects ch'ei stai e ch'ei per part aunc adina da gronda muntada per Trun.» Ella ei stada sill'ucliva da Nossadunna, sigl areal dalla fabrica, dalla Casa Carigiet e dalla sculptura Ogna. «Gest la

fabrica ha secapescha giu in'enorma impurtonza per Trun ed ha giu in'irradiazion sur ils cunfins dil cantun e dalla Svizra ora. Ella ei in mussament da temps passai, mo era dalla crisa dallas textiliias en Svizra. Ella ed era ils auters baghetgs ein perdetgas dil vitg che fatschentan mei. Quels baghetgs e lur historias – cumbinadas per part era cun problems – procuran per tensiun e sco artista eis ei secapescha interessant da luvrar cun quell'atmosfera. Trun ha in grond potenzial pigl art e la cultura», di Gabri che fa il mument il master a Turitg al Seminari da cinematografia dall'universitad e ch'ha scret in cudisch sco lavur da matura davart in scheni ch'ha fatg naufragi.

Maletgs – fotografias – gasettas

Las lavurs che Gabri presenta ell'exposiziun en pliras localitads dil museum sa-

vessen buc esser pli differentas. Igl ei in engaschament multidisciplinar el ver senn dil plaid. Sper il film cun in funs cun musica da Clau Scherrer ei quei per xempel lavurs cun linol, picturas sin enconuscents placats ed ediziuns veglias dalla «Gasetta Romontscha» e dil «Pelegrin» – tut en in connex cun artists e baghetgs da Trun. Ch'ella ha ina predilecziun pil detagl muossa la seria dalla historia digl Uorsin malegiada sin tocca da material curdada dalla Casa Carigiet. L'artista nezegia tocca da lenna, metal ni era eternit per ina retscha da sujets che cumbineschan la historia dalla casa cun quella digl Uorsin, respectivamein dil pictur-artist Alois Carigiet. «En sesez ei quei mia contribuziun per revitalisar la casa», di la giuvna cun ragischs familiaras a Trun. Las lavurs per quell'exposiziun han fatschentau Gabri l'entira stad passada. Ella conceda: «Igl ei stau ina fassa fetg intensiva. Jeu sundel stada cun tgerp ed olma vid quels elements, gie hael schizun semiau da quella lavur. Igl ei veramein stau in engaschament fetg captivont.» En quei process da lavur seigi ella sedumandada pliras ga co ella possi tucrar exactamein quei ch'ella lessa la finfinala mussar en si'optica dil vitg da Trun. La finfinala di la giuvna artista ch'ha era gia scret tocs da teater e columnas per la gasetta dil vitg da Zezras: «Jeu hael veramein vuliu nezegiar il temps ch'ei staus a mi a disposiziun per aschia era saver emplenir prudentamein las bias localitads dil museum cun mia lavur.» Quei ei reussiu cumpleinamein. Ins senta che Gabri ha las marveglias ed il sentiment pils detagls e per las atgnadads, en quei cass da Trun.

MUSICAL SURSELVA

Saults e costums exotics


Joëlle Fryberg da Glion separticipescha al Musical Surselva

DA GIUSEP VENZIN / ANR

Sin siu viadi entuorn il mund fa *Phileas Fogg* negina pausa ell'*Australia*. Quei fuss la tiara preferida da *Joëlle Fryberg* da Glion. La giuvna da 16 onns ha aunc buca giu la caschun da far il viadi el tschunavel continent, sefatschenta denton meinsvart dall'*Australia* ed ei fascinada da ses animals exots. Igl aventurier Fogg e siu cumpogn «Passepartout» fan ina pausa a Bangkok e las scenas ella capitala dalla Tailanda mussadas quest atun a Vella el musical «En 80 dis entuorn il mund» plaian alla absolventa dalla Scola media a Glion. «Ton il sault exot sco ils costums ein cools.»

Seschau entusiasmar

A caschun d'in'informaziun davart il project dil Musical Surselva ha *Joëlle Fryberg* seschau entusiasmar dil musical te-



Joëlle Fryberg da Glion saulta al musical «En 80 dis entuorn il mund» e gioga ina pintgrolla. «Quei vegn fetg bien», eis ella perschadida.

FOTO G. VENZIN

nor il roman da Jules Verne. «Jeu havevel giu udiu dil musical, enconuschevel denton buca la historia.» Udend dallas diffe-

rentas scenas da sault hagi ella buca schau supplicar duas ga e seigi separticipada al casting. Joëlle ei sco pliras autras partici-

pointas al Musical Surselva 2019 ina saltunza passionada. Ella ha saltau plirs onns ellas retschas da «Dance Fun» da Glion e saulta dapresent ellas retschas da «Spescha Dance».

Dapi la primavera exerciteschan Joëlle e sias cameratas per la produczion ch'ha sia premiera ils 18 d'october. Era sch'ell'ei ina saltunza da qualitat conceda ella: «Buca tut ils pass ein aunc corrects.» In'jamna d'exercezi avon la premiera duei procurar per ils pass corrects e per la davosa segirtad. «Quei vegn fetg bien», ei Joëlle perschadida. Culla pedagoga da sault *Sabine Schindler* ed il registur *Roland Körner* han ils participonts dus profis cun bia experienscha cun giuvenils alla testa. «Roland dat peisa alla preschientscha sin tribuna. Jeu sai mo profiter da quei engaschi», di Joëlle.

www.musical-surselva.ch